

ՏԵՂԱԳՐԱԿԱՆ

ԺՈՐՈԹԻ ԱՆՈՋԱՆԸ

(Աշխարհագրական եւ պատմական հետազոտութիւններ:)

(Շարունակութիւն:)

ՆԵՐԱԾՈՒԹԻՒՆ

Այրարատ, Բարձր-Հայք, Գուգարք, Սիւնիք, Վասպուրական եւ Տուրուբերան նահանգներում Աշխարհարեան շրջանից մնացած եւ իրենց գոյութիւնը պահպանած տիտանական ամբողջների, մարտկոցների եւ պարիսպների հսկայական տիպարները մինչեւ օրս խրոխտաբար դեռ կանգուն են ձորոխի Աւաղանում եւ նորա բարձունքների լանջերին ու կատարներին: Տայոց աշխարհը եւ ձորոխի ամբողջ աւաղանը իր քաղաքակրթական զարգացման աստիճանական շրջաններով չի տարբերում իր դրացի նահանգներից, որոց հետ բնական եւ քաղաքական կապերով չլիքալուծ է եղել դարերից ի վեր: Ուրարտա-Ասորական, Հելլենա-Հռոմէական քաղաքակրթական շրջաններից շատ վաղ եւ զուգորթացաբար ինչ ձեւի բերդեր, պարիսպներ, ամբողջներ, դղեակներ եւ տաճար — մեհեաններ, դերեման — Դոմէն-Կուրդաններ, որ մնացել են Հայաստանի կենդրոնական նահանգներում, միեւնոյն ճարտարապետական ոճը նկատելի է ամբողջ ձորոխի Աւաղանում որն սպասցոյց է, թէ կուլտուրան քայլ առ քայլ առաջ է գնացել ինչպէս կենդրոնում, նոյնպէս ծայր նահանգներում, որի շօշափելի վկան է Չուարթնոյի ճարտարապետութեամբ կերտւած Անիի Գաղկաչէնը եւ Ուղտիքի-Տայոցքար Բանայի տաճարները: Պարսարեան աշխարհն իր յիշատակարաններով տարբերութիւն չունի կենդրոնական Այրարատեան աշխարհից, ո՛չ միայն յետամնաց չէ, այլ աւելի հսկայական է Նախա-Ուրարտական կերտւածքներով: Երեւի պատճառն այն է, որ Նայիրի երկրի բոլոր նահանգները աւելի դիւրամատչելի են եղել դրացի բարբարոս ցեղերի արշաւանքներին, աշխարհակալների յարձակումներին, որի հետեւան-

քով երկրի ձեռակերտները դարձեւ դար կործանւել եւ անհետացել են: Իսկ սրակող լեռնաշղթաներով պաշտպանւած ձորոխի խոր խոր ձորերը, դժուարամատչելի Տայոց աշխարհը կարողացել է դիմադրել եւ տոկալ: Տայքը նոյն իսկ իր հարիւրաւոր բալիւրի մշակութեամբ, պղնձի, արծաթի, ոսկու եւ երկաթի հալոցների կազմուածներով քայլ առ քայլ հետեւել է Եփրատի ափերի եւ հարաւային գաւառներին-Աղձնիքին, Բալուխին, Ամիգին, նոյն իսկ Միտանայի բովերի շահագործման եւ մշակման ընթացքին:

Ինչպէս որ խաղողի մշակութիւնը զարգացել է Եփրատի, Արաքսի ափերում, նրանց հետ միաժամանակ որթնատնիկերը զարգացել են ձորոխի Աւաղանում: Միեւնոյնը կարելի է ասել ցորենի, գարու, բրնձի եւ ուրիշ հացահատիկների համար: Թէ եւ հացահատիկները ձորոխի Աւաղանում այս ճոխութեան չեն հասել, ինչ բախտունեցան Բարձր-Հայքը, Տուրուբերանը, Այրարատը եւ Վասպուրականը. բայց իր խոնաւ եւ ջերմ կլիմայի պատճառով ճոխ Սիմինդը (եգիպտացորեն) աճեցրեց: ձորոխի խոր խոր ձորերը այնքան հարուստ մշակւած ձիթենու պարտէզներ ունին, որ բաւարարում են Հայաստանի ամբողջ 15 նահանգներին, իրենց ձիթով եւ ձիթուով, որից նրանք լիովին զուրկ են: Իսկ պտղատու ծառերով այնքան հարուստ է, որ ո՛չ միայն թարմ եւ չոր միւրգ էին փոխադրում չլծակայ նահանգները, այլ թթից, հոնից, սալորից, խաղողից, տանձ ու խնձորից մաթ, պաստեղ, քումա եւ ուրիշ նիւթեր էին պատրաստում եւ արտահանում դէպի դրացի գաւառներն ու նահանգները: Իսկ անտառային փայտի տեսակներով այնքան հարուստ են, որ մրցակից չունին ոչ միայն Հայաստանի ու Վրաստանի գաւառներում, այլ ամբողջ Փոքր-Ասիայում եւ Պարսկաստանում:

Ինչպէս մեծամեծ քաղաքներ հիմնւել են Եփրատի, Տիգրիսի եւ Երասխի ափերում, այնպէս էլ հիմնւել եւ ծաղկել են ձորոխի Աւաղանում: Եփրատը եթէ պարծենում էր թարչիչով, Կարգեմիչով, Աշտիչարով, Մալաթիայով, Մարկալով, Աշտիչարով, Ճապաղձրով, Արծնով. Արաքսը՝ Արմաւիրով, Արտաշատով, Դվինով, Անիով, Խոյմազարով, Բաղրանով, Չարիչատով եւ

Կարսով, ձորոխն էլ դրանցից ետ չմնաց Աբերնեսով, Ահարով, Աշմուշնով, Անիով, Բազդատով, Բահլով, Ախպատով, Արմաշնով, Արտաշնով, Արքունիսով, Խալխալով, Խախով, Մարմաշով, Մարկաշով, Մաբաշով, Ուրով, Չերմեսով, Պալխարով, Սալաշրով, Սպերով եւ Բաբերտոնով: Այս երեքշարք քաղաքների անունները ցոյց են տալիս, որ դրանք իրարից են բլխած, բեղմնաւորւած եւ զարգացած, որոնք ձգտել են մրցել եւ իրար գերազանցել զարկ տալով քաղաքակրթութեան:

Ուր, Ուրեք, Ուրեխ, Ուրկալա, Ուրթըն, Ուրթամասի, Ուրուտ, Ուրքար եւ Ուրծմա գեղերը, որոնք չինւած են ձորոխի Աւազանում նախկին քաղաքների, ամբողջ-բերդերի աւերակներում, որոնք դուցէ նախկին չէն աւանների շարունակութիւններն են կազմում, ցոյց են տալիս Սումմէր-Ակկադների, Հաթթերի, Միտանագիների քաղաքների անունների արձագանգը մեր աշխարհում: Մանաւանդ Սպեր-Խսպիր աւանը, իր շրջակայքի պղնձի հանքերի պեղումներով եւ մշակոյթներով յիշեցնում է Սենսար դաշտի Սիւպարը: Խալխալ աւանը, որ իշխանական ոստանի գեր է կատարել, ինչպէս նախորդարտական շրջանում, Պաշլա-Պարթեւների ժամանակ յիշեցնում է Չագրոսի լեռներում գտնւած Անշանի Խարխարը, Գիլանի Խարխարը, Նուխու եւ Դարալագեազի Խարխարը, որոց հետ համեմատելով աւելի հին է եւ Աչքադարեան չէնքերով նրանցից գերազանց է: ձորոխի Խալխարը նախապատմական, ապա կոկւած, տալւած եւ յղկւած քարերի չինւածքներով, բերդերով, ամրոցներով, պարիսպներով, քրիստոնէական տաճարներով եւ պալատներով ցոյց է տալիս, որ նա իր դիրքը պահանջ է բոլոր յեղաշրջման ընթացքում, գոյութիւնը յարատեւել, ապրել է դարէ դար:

Խալխարի երկրի, Նահարինի աշխարհի նահանգներն ու գաւառները այնպէս են իրար շողկապւած, որ համայն մեր երկրի անցեալի ուսումնասիրութեան համար անհրաժեշտ է ամէն մի նահանգի առանձնաշարտուկ վիճակի հետ ծանօթանալ, նորա անցեալն ուսումնասիրել, ներկայ վիճակը մանրամասն քննել եւ ապա բոլորը իրար միացնելով՝ գրուատել եւ գորովել այն ժողովրդին, որի կեանքը սահել է, անցել

է երկրում 70—80 դարերի ընթացքում: Մեր միջնադարեան պատմաբանները շատ են խօսել, գրել Այրարատեան, Բարձր-Հայք, Գուգարք, Սիսական, Վասպուրական, Տուրուքերան նահանգների մասին, սրանք յատուկ ուսումնասիրութեան նիւթ չեն դարձրել Տայոց աշխարհը — ձորոխի Աւազանը:

Աստուածաշնչի նման հոյակապ թարգմանութեան մեզ աւանդող նախնիքը, որոնք քրիստոնէական դրականութեան բազմազան հատորների թարգմանիչը, կազմակերպողն ու վերաթարգրողներն էին, եթէ նոյնպիսի բարեխղճութեամբ եւ տոկոն ջանքերով աշխատէին իրենց նահանգների աշխարհագրութիւնը, պատմութիւնը, կառուցուածքների նկարագրութիւնը, աւերակների պատկերը, մանաւանդ առասպելական եւ վիպական աւանդութիւնը, պոէմները գրի անցնէին եւ մեզ թողնէին, մենք ա՛յնպիսի թանկարժէք դրականութիւն կ'ունենայինք, որի դէմ կը խամբէին դրացի ժողովուրդների թողած գործերը: Եղիշիկի եւ Եղիշիկի նման գրողների համար դժուար չէր Յուլիոս Կեսարին եւ Տակիտին հետեւելով՝ մեր ժողովրդի վարքն ու բարքը, հաւատալիքներն ու առասպելները, էպոսներն ու նուագները գրի անցկացնել եւ անմահացնել դրանք: Շատ պարզ է, որ մեր զրազէտ վարդապետները անշուրճ չէին. նրանք իրենց առաջնորդների պահանջը լրացրել են մեծ բարեխղճութեամբ, իսկ տէր ու իշխանապետ Նախարարները այնքան անհեռատես ու անտարբեր են եղել, որ միմիայն բերդեր, գղեակներ, պալատներ, կամուրջներ եւ տաճարներ չինել են տւել իրենց անհատական վայելքի համար, երբեք չեն իրախուսել գրողին, ճարտասանին, որ երկրի ժողովրդի վիճակի նկարագրին էլ արձանագրէ: Հելլագայից Յոյն գերասաններ բերել են տւել, նրանց ներկայացումով ոգեւորւել, բայց իրենց բանաստեղծներին եւ դուստներին չեն մտածել վարձատրել: Փարպեցին Վահանի գործերն է արձանագրում, երբ նրանցից պահանջում են կազմել այդ պատմութիւնները. Եղիշիկ Մամիկոնեանի խնդրանքով Վարդանանց Պատերազմի նկարագրին է թողում. Սմբատ Բագրատունու խնդրանքով Մով. Խորենացին Հայոց Պատմութիւնը հաւաքում, գրի է անցնում, եւ Թ. Արծրունին Արծրունի-

ների տան ներքողականն է գրում եւ բոլորը անչափ ժլատ: Այն գրական ոյժերը, որոնք կարող էին հարիւր հատոր Եղիշներ գրել, կուտել երկրի անցեալի գանձարանը իրենց գրածներում, ինչպէս հազար տարւան ընթացքում զարգացած Հայ լեզուն հաւաքեցին ու թողին Աստուածաշնչի մէջ. մի-մի փոքրիկ խղճուկ հատորներով վերջացնում են այն անսահման անցքերի պատմութիւնը, որոնցից կարելի էր մի քանի Աստուածաշնչեր կազմել:

Հարիւրաւոր մեծամեծ կալուածներ իւրացրած նախարարներին տասը տարի ընթացքում նոյնիսկ տասը մեկենաս էլ չի գտնուում, որ գոնէ տասը հատոր գրել-նկարազրել տային եւ թողնէին իրենց յաջորդ սերնդին: 400 թ. մինչեւ 1400 թ. Բագ-րատունիները եւ Ռուբինեանների վախճանը Հայաստանին տիրել եւ ժողովրդին կեղեքել են մի քանի հարիւր նախարարական տոհմեր, որոնք՝ կեղեքել են միլիոնաւոր բնակչութիւնը, իսկ այս հազարաւոր նախարարներից մեկենասներ չեն երեւացել, որ գոնէ 40—50 հատոր յիշատակարաններ գրել տային, յիշատակ թողնէին: Հազար տարւան մէջ հազարաւոր գրադէտ գիտնականները կարողացել են մի քանի հարիւր կտոր կրօնական, եկեղեցական հաստատօր հատորներ թողնել, չարականներ, քարոզներ եւ մեկնութիւններ գրել. մի՞թէ չէին կարող 15 նահանգների մանրագինն աշխարհագրութիւնը թողնել, նահանգներով, գաւառներով, գիւղերով, լեռներով, առուակներով եւ վտակներով բաժանւած: Պարսից արքայից-արքաների չըջանում, Իսլամի խալիֆների օրով, Օսմանեան Սուլթան Սէլիմի դարում ամբողջ Հայ աշխարհի բոլոր աւանները, գիւղերը, ամառանոցները, ձմեռանոցները ցուցակադրւած են իրենց բովանդակած ծխերի թւով պետական հարկային տոմարներում, մի՞թէ ամէն մի նախարար իր վիճակի աշխարհաճամարը չունէր, չէ՞ր կարող կազմել տալ օրինակները մեզ թողնել:

Մեր վարդապետ եւ միայնակեաց կղերը գեղարուեստօրէն նկարազրել են փափկասուն տիկիների, օրիորդների հագուստի կերպաները, ասեղնագործերը, սակի ու զոհարի դարդերը, մարդարտի տեսակները. բայց մոռացել են մեզ բացատրելու աշխատաւորի եւ երկրագործի առտնին վի-

ճակը, աւած հարկերի եւ տուրքերի տեսակները, կատարած բէգեարների չափը. մի խօսքով ստրկի, սպայի, ռստանիկի եւ նախարարների յարաբերութիւնները: Անչուշտ եթէ այդ վարդապետներից պահանջէին, ամենայն ճշտութեամբ դրանց նկարազրելն էլ կ'ունենայինք: Այսօր հայ մագաթների թիւը մի քանի տասնեակ հազարներ են հաշոււմ, բացի կորածներից ու վաւաճներից, հողի տակ փառածներից եւ Բագդատի բաղնիսներում կրակարանների մէջ այրւածներից. սակայն մնացորդ շուրջ 40-000 հատոր ձեռագիրները դարձեալ մեծ գանձ է: Բայց այս 40-000 հատորների մէջ երկրի, ժողովրդի վիճակի նկարագրութիւնը հազիւ թէ մի-երկու հարիւր օրինակից աւելի լինի, այն էլ յայտնի պատմագիրների ընդօրինակութիւններն են, խնամքով պահպանւած. մնացեալները բոլորն էլ կրօնական-եկեղեցական գրքեր են:

ԺԲ. եւ ԺԹ. րդ Դարում մեր վերածնւած գրականութիւնը առանց պետական օժանդակութեան չէր կարող մեծագործութիւն անել եւ անցեալ գրականութեան մասին ամփոփ տեղեկութիւն տալ: Ինչ որ կատարւել է բարեգործական ընթացք է ունեցել: Հետեւաբար մինչեւ օրս խալիֆի երկրի-նախկին Հայաստանի բնավայրը չէ ուսումնասիրւած: Աղբիւրներ չունինք, որ օգտւինք հին գրականութեան եւ արձանագրութեան բեկորներից եւ նորագոյն գրական բանասէրների ենթագրութիւններից: Մեր երկրի ցեղի, լեզուի անցեալն աւելի լաւ են ուսումնասիրել գերմանացիները, անգլիացիները եւ Ֆրանսիացիները իրենց պետական օժանդակութիւններով, քան թէ մեր բաղմաճան բարեգործ բանասէրները. որոնք զոհւել են գաղափարական թռիչքներին: Իսկապէս բուն երկրի մէջ գործող, իրական աշխարհը քննող, աւերակները պեղող եւ կործանւածների արտայայտութիւնների հիման վերայ ուսումնասիրութիւններ կատարող, բերդերի, ամրոցների, գղեակների, գերեզմանների բեկորների ցուցումների համաձայն մի նոր եւ գրական գործ չէ կատարւած: Այս ուղղութեամբ նոր սկսւած գործերը խիստ թերի եւ շարունակութեամբ անհրաժեշտութիւն կայ. բայց այդ թերին լրացնող գեռ չի երեւում:

Այս ասպարիզում մեծ գործ կատա-

ընել են Մխիթարեանները երկու հարիւր տարւան անընդհատ խուզարկութիւններով՝ զրազարանների մէջ, որոնք վանքերում սնւել, խնամւել եւ ամբողջ ոյժով նուիրւել են մեր նախնեաց գործերի ուսումնասիրութեամբ: Մխիթարեանները ոչ միայն հնրից մնացած գրականութիւնը քննութիւնների բովից անցկացրին եւ զտեցին, այլ եւրոպական գրականութեան մէջ մեր երկրի, լեզուի, գրականութեան, պատմութեան, ցեղագրութեան, պեղումներից դուրս բերւածների մասին յայտնագործւած ամէն մի գործ թարգմանեցին եւ ժողովրդականացրին: Սորանից աւելին չէին կարող անել, քանի որ նիւթապէս կաշկանդւած էին եւ տիրող պետութիւններից արգելւած: Այլշանը 70 տարի Հայաստան երգեց եւ առանց Հայաստանը տեսնելու, այցելելու՝ գերեզման իջաւ: Այտնեանը Հայ գեղջուկի դաւառական բարբառները եւ նրանց կազմն ու փոփոխութիւնները վերլուծեց, առանց Հայաստանի օդը չնչելու եւ ջուրը խմելու:

Նկատի ունենալով որ այժմ հին Հայաստանի գաւառների յիշատակարաններից մնացորդները ի սպառ կործանւում են, կենդանի Հայաստանը ի սպառ ջնջւում է, յետոյ, պատմական յիշատակարանների ջնջումն է կատարւում, Լէնգ-Յեմուրի, Լալա եւ Օսման-Ֆէյզի փաշաների կիսատ թողածները մեծ քաջագործութեամբ լրացնում են. ուստի հաւաքածու տեղեկութիւնները, փաստերը, ուսումնասիրութիւնները ձորոխի Աւագանում ցանկացայ սոյն երկով աւանդել ապագայ սերնդին: Քսան տարի է տքնում էի քիչ ապահովել տնտեսական, անձամբ այցելել նորից այդ վայրերը, աւերակները լուսանկարել, չէնքերի յատակագծերը, հատուածականները գծագրել ամբողջ ձորոխի Աւագանում, վերստուգել տեղն ու տեղը եւ գրուածներն պատկերներով ներկայացնել գիտական աշխարհի քննութեան. բայց՝ 1914 թ. սկսւած միջազգային պարհուրելի առերաժը՝ ծրարընեա հիմքից խորտակեց եւ ես ստիպւած եմ այս օր միայն հնարաւորը տալ, թողնելով ապագային՝ յաջորդներին իրենց դատողութեամբ շարունակելու ինչ որ օգտաւէտ կը գտնին իրենց ժառանգների համար:

Լեւոնական:

(Շարունակելի):

ԱՅՐՈՅՏ

ՄԱՏԵՆԱԽՕՍԱԿԱՆ

“DER KLEINE HERDER”, Nachschlagebuch über alles für alle. Freiburg i. Br. 1925. I. Halbb. A.-K. 8°, 752. II. Halbb. L.-Z, 8°, 780.

Հերդերի Նշանաւոր հրատարակութիւններից մին է այս “Հանրագիտակ”ը: Գիրքը բանալի աչքի է զարնւում նրա արտաքին գեղեցկութիւնը՝ փոքր, բայց որոշ գիրը, պատկերազարդ էջերը — ունի 4.000 պատկերներ եւ այն լուսանկարի եղանակով յաջողւած արտատպութեամբ, որից Larousseը եւ նման գործերը զուրկ են:

Իսկ բնագիրը բոլորովին գիտական, սակայն շատ դիւրահասկանալի ոճով գրուած: Տեղեկութիւնները հակիրճ, պայծառ ու առարկայական են, միշտ էականն ու նորագոյն տեսակէտն է յառաջ բերւում: “Փոքրիկ Հերդերը” գիտացել է իրան մի ժողովրդական գիրք անել սովորեցնելով թէ ինչպէս գիտութիւնը ամենօրեայ կեանքի համար օգտագործել կարող ենք, մանաւանդ համաշխարհային պատերազմից յետոյ, որը սովորեցրեց մեզ շատ բան խնայել եւ ամենաչնչին բանն օգտակարապէս գործածել: Այսպէս նա տալիս է միշտ վստահելի պատասխան ամենօրեայ կեանքի ամէն հարցերի մասին՝ ինչի հարցանողը գիտնական կամ անուս, երկրագործ կամ արհեստաւոր, ուսուցիչ, վաճառական, ճանապարհորդ, բնութեան եւ սպորտի բարեկամը կամ գրքերի ցեցը, խնամատ մայրն ու տանտիկինը, նաեւ հետաքրքիր աղախինը ու գլխաւորարար ակադեմականը, որ ֆակուլտէտի էլ վերաբերուի, մի խօսքով բաղմանձնեայ “ամէն գրքը”. աւելի քան 50.000 հարցերի մասին է խօսում նա: Մասնաւոր տեղ են գրաւում երկիրներն ու քաղաքները, ինչպէս եւ Հայաստան բաւական ընդարձակ, երեւան, Էջմիածին, Նախիջեւան եւն: Բաղձալի էր մեզ սակայն կարդալը թէ քրիստոնէութիւնն առաջին անգամ Հայաստանում է պետական կրօնը դարձել (Գեղցեր) կամ հայերը ունին մի առանձնայատուկ գիր եւ գրականութիւն Ե. դարի սկիզբից:

Ղ. ՊԵՆՏՈՅԵԱՆ